

BOSNA I HERCEGOVINA
BRČKO DISTRIKT BOSNE I HERCEGOVINE
OSNOVNI SUD BRČKO DISTRIKTA BiH
Broj: 96 o Ip 167310 24 Ip
Brčko, 19.02.2025. godine

Osnovni sud Brčko distrikta Bosne i Hercegovine, sudija Perić Mara, u izvršnom predmetu po prijedlogu tražioca izvršenja Brčko distrikt BiH zastupan po zastupniku po zakonu Pravobranilaštvu Brčko distrikta BiH, protiv izvršenika Kompanija "Elins Panić Kep" d.o.o. Brčko, ulica ..., zastupana po zakonskom zastupniku, direktoru P.V., radi nalaganja, odlučujući o prigovoru izvršenika izjavljenom protiv rješenja ovog suda broj: 96 o Ip 167310 24 Ip od 05.11.2024. godine, van ročišta, dana 19.02.2025. godine, donio je sljedeće:

R J E Š E N J E

Prigovor izvršenika od 20.11.2024. godine, izjavljen protiv rješenja o izvršenju ovog suda broj: 96 o Ip 167310 24 Ip od 05.11.2024. godine, se ODBIJA kao neosnovan.

Obrazloženje

Tražilac izvršenja je 25.10.2024. godine podnio sudu prijedlog za dozvolu izvršenja, protiv izvršenika, na osnovu izvršne isprave sudske nagodbe broj: 96 o P 099546 20 P 2 od 20.10.2020. godine, radi uklanjanja opreme i to kрана sa dijela nekretnine označene kao k.p. broj 618/6 zvana G., livada III klase, ukupne površine 400m², kao i troškova izvršnog postupka.

Rješenjem ovog suda broj: 96 o Ip 167310 24 Ip od 05.11.2024. godine dozvoljeno je predloženo izvršenje, a troškovi tražioca izvršenja određeni u ukupnom iznosu od 220,00 KM.

Protiv navedenog rješenja, zakonski zastupnik izvršenika direktor Veselin Panić blagovremeno je izjavio prigovor dana 20.11.2024. godine (prema dostavnici u spisu izvršenik je zaprimio rješenje dana 12.11.2024. godine) u kojem ukazuje na navodne nezakonite radnje koje su preduzete prema kompaniji „Elins Panić Kep“ od strane Brčko distrikta BiH.

Zatupnik po zakonu tražioca izvršenja dostavio je odgovor na prigovor navodeći da isti nije izjavljen iz razloga propisanih odredbom člana 59 Zakona o izvršnom postupku Brčko distrikta BiH, da je ulaganje prigovora usmjereno na odugovlačenje postupka od strane izvršenika, kao i da predmetni kran predstavlja opasnost. Predlaže da sud prigovor odbije kao neosnovan i nastavi sa postupkom izvršenja odnosno uklanjanja kрана.

Odlučujući o prigovoru izvršenika sud nalazi da prigovor izvršenika nije osnovan.

Nakon što je ispitao navode iz prigovora izvršenika, ovaj sud je odlučio kao u izreci ovog rješenja, a iz slijedećih razloga:

Pobijano rješenje o izvršenju dozvoljeno je po prijedlogu tražioca izvršenja na osnovu Sudke nagodbe broj 96 o P 099546 20 P2 od 20.10.2020. godine koja shodno odredbama člana 25. Zakona o izvršnom postupku Brčko distrikta Bosne i Hercegovine predstavlja izvršnu ispravu.

Iz sadržine izjavljenog prigovora sud je zaključio da izvršenik zapravo i ne prigovora rješenju o izvršenju, nego da ističe navodne nezakonitosti koje su preduzete prema kompaniji "Elins Panić Kep", a koje ovaj sud tokom izvršnog postupka ne može ispitivati i koje u konačnici nemaju uticaj na postupak izvršenja u ovoj pravnoj stvari. Izvršenik izjavljenim prigovorom nije doveo u pitanje pravilnost i zakonitost rješenja o izvršenju, niti je dokazao da je ispunio obavezu iz izvršne isprave, odnosno da je sa dijela nekretnine označene kao k.p. broj 618/6 zvana G, livada III klase, ukupne površine 400m2 uklonio kran, shodno čemu je sud navedeni prigovor ocijenio kao neosnovan.

Odredbom člana 59. Zakona o izvršnom postupku, koja određuje postupak povodom prigovora protiv rješenja o izvršenju na osnovu izvršne isprave, propisano je da se prigovor protiv rješenja o izvršenju može podnijeti, a citirana odredba navodi i razloge (od tačke 1. do tačke 11.) koji sprečavaju izvršenje, pa kako izvršna isprava na osnovu koje je doneseno pobijano rješenje nije ukinuta, poništena, preinačena ili na drugi način stavljena van snage, odnosno ni na koji drugi način nije izgubila svoju djelotvornost niti je utvrđeno da je bez učinka, a kako izvršenik u prigovoru protiv rješenja o izvršenju ne navodi razloge koji sprečavaju izvršenje, odnosno ne navodi razloge koji sprečavaju prinudnu naplatu predmetnog novčanog iznosa, valjalo je prigovor izvršenika odbiti kao neosnovan i odlučiti kao u izreci ovog rješenja, a na osnovu člana 61. Zakona o izvršnom postupku.

POUKA O PRAVNOM LIJEKU:

Protiv ovog rješenja može se izjaviti žalba Apelacionom sudu Brčko distrikta BiH u roku od 8 dana računajući od dana dostavljanja, a putem ovog suda.

SUDIJA

Mara Perić